


Noticia
Transparente
di Gobierno

ISLA ONLINE

Diahuebs 8 Augustus 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



DOW ta traha un planificacion a base di e grado di prioridad E AÑA AKI TIN 17 MIYON FLORIN RIBA E PRESUPUESTO PA POR HACI INVERSION DEN NOS CARETERANAN



Diaranson 7 di augustus, Prome Minister Evelyn Wever-Croes hunto cu su ekipo a reuni cu funcionarionan di Dienst Openbare Werken (DOW) pa planifica e trabounan di asfalt cu mester bay tuma lugha. Prome Minister a duna di conoce cu e aña aki tin mas placa riba e presupuesto pa por haci inversion den nos careteranan y p'esey DOW ta haciendo planificacion.

Pa trabounan aki na Aruba tin retonan entre otro tin un planta so di asfalt consecuentemente tin tardansanan. Otro reto ta e camindanan di santo cu ta poni riba lista pa bay asfalta pero ta resulta cu tin por ehempel palonan di luz meymey unda e caminda mester bin, of cura di casnan ta riba e caminda of tuberia cu mester pasa ainda. Por lo tanto no ta tur e retonan ta den man di DOW pero si nan ta atende cu esakinan y e caminda ta keda den e planning.

Tambe DOW a trece e resultado di e estudionan y investigacion cu nan a haci riba con den un periodo largo por drecha tur caminda na Aruba. Eynan a yega na e conclusion cu di awor pa 15 aña lo mester por inverti 17 miyon florin cada aña den cua periodo asfalta e camindanan di santo y por drecha tur cu e camindanan cu tin mester wordo drecha. Naturalmente, pa esey mester mas placa. Pa awor aki, pa e aña aki, tin 17 miyon florin disponibel pa traha riba careteranan di santo pa haci nan di asfalt y pa traha riba e mantencion di e careteranan di asfalt cu ta den mal condicion.



DOW ta aplica un sistema pa pone prioridad riba careteranan. Depende con malo e caminda ta, e costo di drecha un caminda di santo cada biaha, cuanto hende ta biba eynan y con frecuente e caminda ta wordo uza, y asina ta traha un planificacion a base di e grado di prioridad.

“Nos meta ta pa percura pa nos camindanan di santo bira asfalt y pa tur nos careteranan di asfalt den mal estado wordo drecha. No ta posibel pa haci tur na e mesun momento. Si tin mas fondo disponibel awor door di e capacidad financiero, pero na Aruba tin un limitacion di capacidad pa traha of drecha caminda cu asfalt. Pero e tin nos atencion y hunto cu DOW nos lo sigui enfrenta tur e retonan aki y nos lo percura pa e careteranan haya e atencion necesario”, Prome Minister a remarca. ■■■



MINISTER ENDY CROES A ELABORA RIBA E REUNION CU SCHOOLBESTUUR DI COLEGIO ARUBANO



Recientemente, Minister Endy Croes a reuni cu Sra. Mariska Dania y Sra. Deta Figaroa di directiva di Colegio Arubano, esta Stichting Voortgezet Aruba (SVOA). Representante di DUOS tambe tabata presente durante e encuentro aki. E directivanan di scol ta den pleno preparacion pa apertura di Aña Escolar 2024 – 2025 pa garantiza un aña escolar exitoso pa nan studiantenan.

Durante e encuentro a trata diferente punto di interes entre otro, e vacatura di director di Colegio Arubano, unda cu nan a duna informacion actualisa di e proceso. Alabes, a haci peticion pa un conector y un trahado administrativo mas. DUOS lo haci un ehercicio pa mira si tin e fondonan pa asina por aporta na e peticionnan aki. Tambe a remarca cu e caminda entre Colegio

Arubano y ex- Emma School a deteriora hopi y mesora Minister Endy Croes a tuma contacto cu DOW pa haci un calculacion y ohala cu pronto e por wordo drecha. Ademas di esaki, SVOA tin un deseo riba termino mas largo, pa e directiva cu actualmente ta huur un edificio pafo di scol, lo por traha un edificio dentro di e tereno di scol cu lo fungi como nan oficina oficial. Lo forma un team pa traha riba e proyecto aki.

Por ultimo, Minister Endy Croes a indica cu tabata un bon reunion. Alabes, e mandatario di Enseñansa y Deporte ta desea nan hopi exito den e aña escolar nobo. “Semper nos ta traha cu e posicion pa crea plataforma y ambiente pa e alumno por wordo miho sirbi. Trabou pa bienestar general ta continua tur dia. Nos ta avansando”, Minister Endy Croes a finalisa.

Minister Endy Croes:

PRONTO LO INICIA CU PROYECTO PILOTO DI PANEL SOLAR PA E SCOLNAN DI DPS



Recientemente, Minister di Enseñansa y Deporte Endy Croes a reuni cu director Sr. Vincent Solognier y Sr. Murray Irausquin di B-Energy Solar. Durante e bishita, nan a duna un presentacion amplio tocante panel solar y e servicionan cu nan ta ofrece. B-Energy Solar ta un compania cu mas di nueve (9) aña di experiencia den instalacion di panel solar na Aruba. B-Energy Solar ta brinda un variedad di panel solar di nivel cu por proporciona hasta 10 kwp di energia pa cas y/of sistema di 100 kwp pa empresa.

Actualmente, nan tin contract cu diferente schoolbestuur na Aruba. Durante e encuentro, e mandatario di Enseñansa y e representantenan di B-Energy Solar a haci un acuerdo pa un proyecto piloto pa e scolnan resorta bou di Dienst Publieke Scholen (DPS). Mirando cu Scol Practico pa Ofishi (SPO) Brasil tin un infraestructura moderno y e instalacion di coriente ta cumpli cu tur standard y rekesito, lo inicia cu e proyecto piloto eynan. E idea di esaki ta pa baha uzo di coriente na scol y rebaha gasto pa inverti mas den enseñansa. Durante e reunion, nan a duna ehempel concreto di con e sistema aki a funciona na e otro scolnan.

Minister Endy Croes ta gradici Sr. Solognier y Sr. Irausquin di B-Energy Solar pa e informacion cu el a ricibi en cuadro di energia limpi, cumpliendo cu e meta di desaroyo sostenibel mundialmente. Dentro di poco, e mandatario di Enseñansa lo ricibi un oferta cu e plannan cu nan ta ofrece y lo amplia un modelo pa futuro pa nos scolnan cu ta contribui na e desaroyo sostenibel.



MINISTER ENDY CROES A RICIBI INFORMACION ACTUALISA DI E ULTIMO DESAROYONAN DI FUNDACION LOTTO PA DEPORTE



Minister Endy Croes a elabora riba un reunion cu presidente di Hunta di Supervision di Fundacion Lotto pa Deporte Sr. Robert Maduro. Durante e encuentro, e mandatario di Deporte a ricibi informacion actualisa di entre otro, e negociacionnan cu ta tras di lomba, e contractnan cu ta firma y e cambionan grandi cu ta na caminda pa Lotto pa Deporte di acuerdo cu e contractnan cu ta firma caba. Sr. Maduro a comparti cu e mandatario informacion actualisa di con leu nan ta cu e parti huridico, accounting y cuenta anual.

Sr. Maduro a accentua cu loke cu a hereda di e directiva anterior di e asignatura di AVP tabata “total loss”. Primordialmente e jaarrekening nan cu no tabata cla, no tabatin claridad y falta di transparencia y documentacion. E directiva nobo a haci un trabou hopi grandi, unda cu a encarga e expertonan pa por a logra cera por ehempel, jaarrekening di aña 2020 y 2021. Fin di luna di juli ultimo, a entrega e cuenta anual di aña 2022 y asina a haci un “inhaalslaag” hopi grandi pa e fundacion. Den e proximo 3 lunanan lo “haal in” e jaarrekening di aña 2023.

Prome cu fin di aña 2024 Lotto pa Deporte por cumpli cu e parti di “Good Governance”, pa e jaarrekening ta na ordo.

Esaki ta un aspecto hopi importante cu e directiva actual a pone hopi enfasis riba dje. Sr. Maduro a duna Minister Endy Croes un avance di e trabounan di e “inhaalmanoeuvre” cu nan mester a haci pa asina e fundacion cumpli bek cu e reglanan local y internacional. Banda di esaki, Sr. Maduro a duna un splicacion di e vision di Lotto pa Deporte pa deporte di Pais Aruba y e fondonan cu lo por tin reserva pa cumpli cu e maneho di e mandatario di Deporte y Gobierno di Aruba.

Por ultimo, Minister Endy Croes a indica cu e ta agradecido pa e informacion ricibi. “Un bes den seis siman nos ta reuni cu e presidente di Lotto pa Deporte y un bes den 3 luna nos ta acudi na e reunion di directiva pa por scucha y keda al tanto di tur loke cu ta pasando. Alabes, percura cu tin e fondonan necesario pa cumpli cu e vision di gobierno y cumpli cu nos maneho,” Minister Endy Croes a finalisa. ■■■



PRONTO NOS LO HACI ANUNCIO GRANDI PA CU ENSEÑANSA PA EMPLEO

EPE ta e vehiculo pa abo logra e trabou di bo soño

Den e prome 6 lunanan di 2024 Enseñansa pa Empleo a habri porta pa ofrece un diversidad amplio di cursonan pa henter comunidad di Aruba.

Duante inicio di año, EPE a ofrece un total di 24 diferente cursonan, cual e resulta den 30 klas y un total di 488 cursistanan.

Mientras cu e cursonan tabata tumando luga, a traha riba diferente otro proyecto- y iniciativanan.

Durante e prome 6 lunanan nos tabata tin e privilegio pa duna asistencia y guia na e siguiente gruponan:

- SVT – Formacion Social - grupo di damas: E grupo aki a sigui cu exito e cursonan di Ingles, Computer Basico y Klein Vaarbewijs.
- Fundacion Muchila Creativo a ricibi un curso di introduccion den Hospitality como tambe diferente workshops na unda a enfoca riba apariencia y e importancia di excelencia den servicio. Den cooperacion cu Divi y Marriott Hotels, e hobennan di Muchila Creativo a haya e posibilidad pa demostra y practica nan habilidadnan adkiri den e curso.
- Pa adultonan 60+ – a facilita 2 curso pa e proyecto di “Hunto grandi, Grandi Hunto” di Fundacion Movimiento ta Bida, esta di computer y tambe di teatro.
- A desoroya cursonan specifico riba di e necesidad di diferente departamento di Gobierno

EPE a sigui enfoca riba estrecha e relacion cu mercado laboral, sector gubernamental y comunidad. A participa den diferente exposicion di trabou y di enseñansa pa duna mas informacion riba tur e cursonan cu EPE ta ofrece pa (re)capacitacion pa esnan interesa pa amplia nan conocimiento pa haci nan (re) entrada den mercado laboral hopi mas accesibel.

Danki na e bon relacion cu EPE tin cu sector priva, EPE a wordo acerca pa ofrece cursonan di idioma na empleadonan di diferente di nos hotelnan. Un logro sumamente importante cu e sector priva ta, cu EPE a logra pa HR directors presencia e diferente examen den e ramo di hospitalidad pa demostra e balor y calidad di e cursonan cu EPE ta ofrece. Esaki a conduci cu diferente cursista a wordo ofreci trabou di biaha.

E siguiente tanda di cursonan lo cuminsa 19 di augustus 2024. Ainda por inscribi aunke cuponan ta limita. Cursonan cu lo wordo ofreci ta:

Curso nan Enseñansa Pa Empleo Augustus 2024		
 Minister di Labor, Energia & Integracion	English Beginners	Sales & Marketing 1
	English Intermediate	Sales & Marketing 2
	Nederlands Beginners 1	Human Resource 1
	Nederlands Beginners 2	Human Resource 2
	Papiamento	Supervisory Management 1
	Office Skills	Supervisory Management 2
	Basis Kennis Boekhouden	Waiter
	Computer Beginners	Bartender
	Computer Excel	Casino Dealer Poker games
	Arbeidsrecht in de praktijk	Casino Craps
	Klein Vaarbewijs	Klein Vaarbewijs

Y fin di luna keda pendiente pa dos anuncio sumamente importante pa henter pueblo di Aruba y di San Nicolas den especial!





Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD